

Qualiter post Consules creati sunt iterum Potestates Vicentiæ: & quomodo Vicentini clausurunt aquam fluviorum labentium Paduam.

Istis Consulibus succedit Marchexinus de Maynardis in Potestatem. Hic suo tempore contra Communitatem equitavit apud locum, quem Comes tenebat, qui dicebatur Saxeolum, non longè à Scedo, illumque locum captum comburi fecit, & ad Civitatem rediit.

Tunc temporis Vicentini cum Veronensibus à Tervisinis aquam Bachilionis, & Beronis fluviorum labentium per territorium Vicentinum ad Civitatem Paduæ clausurunt, & abstulerunt Paduanis.

Series Potestatum aliquot Vicentinorum, & rerum, quæ sub illorum Potestariis acciderunt.

Huic successerunt in Potestatem Viradinus de Costa, & Martinellus de Benenca. Hoc in tempore Comes Albertus, cum militando obviasset Mario de Porta Nova, interfecit eum.

Succedit istis in Potestatem Oliverius Enselbardus de Papia. Sub istius Potestaria interfecit Andreas de Serratico in Villa (13) Lonici, præliando pro illis de Castignunculo, & illis de Monticello contra Commune Lonici, currente Millesimo CCIV. die secundo exeunte Octobri.

Huic succedit Bernardus Vexillifer Papiensis. Sub isto venit Studium Scholarium in Civitate Vicentiæ, & duravit usque ad Potestariam Domini Drudi.

Huic successerunt Comes Ugutio, & Vido de Vivario.

Istis autem successit Dominus Lombardus de Cremona. In exitu Potestariæ istius conspiraverunt insimul Comes Vido, & Conradus de Vivario, qui cum amicis suis armati tot fuerunt ad Consilium factum de Potestate eligendo, quod violenter se se eligi in Potestates fecerunt, qui nimis sæventer, & perversè regebant Civitatem.

Et tunc temporis Dominus Oldricus de Vicecomitibus erat Potestas Veronæ, quia ipse cum Melchiore (14) Bonifacio, & cum Monticulis violenter expulerat Dominum Azonem Marchionem de Potestaria Veronæ, sumpta occasione, quod partem suam volebat dare Marchioni Bonifacio, & sic se fecerat eligi in Potestatem Veronæ. Qua propter idem Marchio, undique conquistis amicis, & cum Mantuanis contra ipsum, & partem, quæ (15) expulerat de Civitate, conspirando, intravit Civitatem Veronæ, & magnum paravit exercitum. In quorum Veronensium succursum nobilis Eccelinus memoratus cum magna militum quantitate, contra eundem Marchionem similiter eandem Civitatem intravit, cum quo ivit tunc Comes Albertus, filius quondam Comitum Ugutionis, (16) quia tunc temporis acce-

A perat Dominam (17) Ymigram, filiam ejusdem Domini Eccelini in uxorem.

Interim autem discordia oritur inter Vidonem Comitem, & Conradum de Vivario, & cum descendissent de Palatio Communis Vicentiæ, & ivissent ad domos proprias, Populares domum ascenderunt Communis, & ipsis de Potestaria remotis, elegerunt Dominum Gulielmum de Pusterla, Civem Mediolanensem in Potestatem. Qui cum venisset, & sacramentum sui regiminis fecisset pacificè, audito rumore Veronensium, tam sibi, quam Communi Consilio Civitatis placuit cum pleno exercitu ire ad Civitatem Veronæ pro bono pacis, & concordie, non ea intentione (18), quod aliqua partium ipsorum læderetur occasione. Iverunt ibi, & apud Civitatem castrametati sunt. Et post multa colloquia facta cum partibus, videntes, quod pacem ponere non poterant inter ipsas partes, reversi fuerunt ad Civitatem Vicentiæ. Mantuani autem in succursum Marchionis, & suæ partis totis viribus occurrerunt, & bello ac præliis per totam Civitatem commissis, tandem obtinuit Marchio & pars illius, altera parte fugata & de Civitate violenter expulsa. Illo namque die vix evasit Dominus Eccelinus à manibus Marchionis cum militibus suis. Fugerunt ergo contrarii Marchionis ad arcem Gardæ, & Marchio cœpit dominare Civitatem, domos & turres inimicorum suorum radicitus destruendo. Tunc temporis etiam expugnavit cum Domino Salinguerra de Ferraria, ipsumque cum parte sua expulsi de Civitate Ferrariæ, & ipsam violenter detinet occupatam. Arcem autem Gardæ, ubi fugerant inimici illius, undique per terram, & aquam strictissime obsidebat.

C Dominus autem Eccelinus, videns amicos suos taliter fugatos, & destructos, cogitando qualiter amicis suis, qui obsidebantur in Gardæ, melius posset subvenire, cum maxima propriæ pecuniæ quantitate adivit Civitatem Brixiam: ibique moram faciens multos comparavit amicos. Et cum tam strictè per Marchionem amici sui obsiderentur in Gardæ, quod omnia jam cibaria penitus illis defecerant, (19) ille fortissimus Eccelinus, vidente Marchione, & exercitu suo universo, cum cibariis necessariis per Lacum Gardæ armata manu, ferreis catenis fractis, ivit ad Gardam, & amicis suis bene ad annum unum necessaria tribuit cibaria, & sic reversus est ad Civitatem Brixiam sine cujuscumque contradictione. Revertitur & Marchio cum exercitu suo ad Civitatem Veronæ cum nimia tristitia, & tamen dominatur Veronam, atque Ferrariam.

D Nunc mutatur Potestas Vicentiæ, cui succedit Dominus Drudus de Buzarino de Mediolano, qui dicitur Buzarinus, qui, ut tutior permaneret, à pluribus Magnatibus Vicentinis filios pro obsidibus abstulit, & misit Mediolanum, inter quos erat Artuxius de Vivario, filius Domini Conradi, & Albertus de Celsano, filius tunc Pili Vincentii, & alii quamplures. Marchio autem, & Comes Bonifacius de Sancto Bonifacio induxerunt Comitem

(13) Aliter Leonici.

(14) Legendum Marchione Bonifacio, scilicet Estense, cujus dissidia cum Azone Marchione memoravi in Antiquit. Estens.

(15) Adde eum pro se more seculi.

(16) Fortè melius qui.

Tom. VIII.

(17) Imiam alii.

(18) Aliter sic legi hæc possent quod aliqua partium ipsarum læderetur. Hac occasione iverunt ibi, &c.

(19) Melius ipse.